

清史列傳

清史
王鍾翰點校

清史列傳

第十七册
卷六五至卷六八

中華書局

清史列傳卷六十五

忠義傳

勞漢

尹布等

勞漢，滿洲正藍旗人。姓他塔喇氏，世居札庫木。國初來歸，從攻撫順，以第一人先登，克其城，授佐領。旋偕筆帖式尹布、閒散球從征額黑庫倫，有功。尋征烏拉，球隨阿蘭珠等下馬步戰，所向無當，其鋒者。明總兵毛文龍遣部將率千餘人潛犯我汛地，勞漢、球率騎十八、步卒二十邀擊，殲之。球追逃人至敖漢，及之，同葉臣大破其衆。同雍舜等攻旅順口，糜衆進，遂取之。球授騎都尉，勞漢得賞賚。天聰元年，勞漢及佐領固吉納、孟健從征朝鮮，攻義州，副都統西達爾翰衝陣，流矢傷目，猶手刃數人，始仆。勞漢夜登城，戰歿。二年，大兵征瓦爾喀什，孟健先登，歿於陣。四年，大兵征葉赫，固吉納奮勇陷陣，被戕。八年，球、尹布追剿索倫部之喀木尼哈葉雷，多斬獲。九年，球加一雲騎尉。崇德二年，尹布授雲騎尉。三年，尹布隨貝勒岳託征明，攻望都，穴其城，克之。四年，尹布晉世職爲騎都尉。從都統索海、薩穆什喀征黑龍江，獲三十餘人。復隨副都統羅濟進擊杜俄臣兵，羅濟中創歿，尹布援之，亦歿於陣。六年，球從大兵攻錦州、松山、杏山城，明總督洪承疇遣兵六千，夜犯我營。球力戰，陣亡。勞漢，

贈騎都尉，子薩喇奇襲。

尹布，滿洲鑲紅旗人，姓寧古塔氏，子宜爾特赫，襲騎都尉世職。球，滿洲鑲紅旗人，姓棟鄂氏，固吉納與球同旗，姓洪鄂氏。球弟糾禪，固吉納弟伊勒穆，並襲騎都尉世職。孟健，滿洲鑲藍旗人，姓戴佳氏，西達爾翰，滿洲人，入漢軍正白旗，羅濟，滿洲鑲藍旗人，贈廕，俱無考。

護穆薩

覺羅蘭泰等

護穆薩，滿洲正黃旗人，姓賴布氏，世居佛阿拉。崇德五年五月乙巳，以武備院卿從大兵征明，距錦州城五里列陣，以礮攻城北涼馬土臺，克之。七月乙酉，睿親王多爾袞遣卒刈城西北禾稼，明兵突出，槍礮並施，護穆薩與護軍參領覺羅蘭泰、署護軍參領溫察力戰，明兵大潰，追至濠，掩殺之，克臺九，及小凌河西岸臺二。先是，錦州外城蒙古貝勒諾木齊等見我兵困城，志必得，謀來降，遂持書縋城下，約內應。信洩，我軍至，明總兵祖大壽出拒戰，城內蒙古縋繩，我軍援之登，吹角夾攻，護穆薩躍上被創，卒。覺羅蘭泰、前鋒參領弘科俱陣歿。廩戰久，明師退守內城，我兵入外城。

明年五月乙亥，明總督洪承疇率六總兵、兵六萬來援，屯松山北岡。我師擊斬二千，其兵猶勁。騎都尉且岱、參領彰庫善、三等侍衛博朔岱，陷陣死。八月壬戌，大軍駐松山，杏山間立營，截大路。承疇率馬步兵十三萬營松山城北亂峰岡。癸亥，犯我汛地，輝蘭同參領囊古擊卻之，參領阿福尼越衆衝突，負重傷，猶斬將奪幟，諸軍繼之，敵奔塔山。我兵移營松山城外。十二月甲寅，承疇以兵六千夜至，輝

蘭奮殺，既出，復進擊，與溫察啓心郎邁圖皆沒。我兵沿濠射之，殺四百餘人，敵退入松山城，濬濠圍之。明總兵曹變蛟欲突圍出，至正黃旗汛地，佐領彰古力戰死。變蛟亦中創奔還。七年二月辛酉，克松山，擒承疇及明巡撫邱民仰，總兵王廷臣、變蛟等。時明總兵吳三桂猶駐塔山，鄭親王濟爾哈朗率兵至城下，列紅衣礮攻之。佐領崔應泰被創死，參領邁色力戰陣亡。城壞二十餘丈，諸軍悉登，遂克塔山。

覺羅蘭泰，滿洲正紅旗人，贈雲騎尉。溫察，滿洲鑲藍旗人，姓赫舍里氏。弘科，滿洲正白旗人，世居那木都魯，以地爲氏，邁色，任護軍參領；俱額駙康果理之子。日岱，滿洲鑲黃旗人，姓伊喇理氏，世居葉赫。授佐領，率護軍越明北京，攻取邊城，又梯攻安肅城，克之，授雲騎尉，至是贈一等輕車都尉。子達哈塔，襲三次，(三)遇恩詔加至二等男。彰庫善，蒙古正黃旗人，贈雲騎尉，弟猛色禮襲。博朔岱，蒙古正黃旗人，姓拜葉氏，特賜銀五百兩，遣官致祭。輝蘭，滿洲鑲藍旗人，姓舒覺羅氏，由閒散於天聰五年隨攻大凌河，擊明監軍道張春兵，隨羅大敗其衆。六年圍明大同，略五臺山土堡，克之。八年復入明邊，略其地出邊時，偕希爾根殿，兩敗阿爾沙蘭兵，贈騎都尉，子色赫襲。

阿福尼，滿洲正黃旗人。初襲勳舊佐領。天聰三年，大兵越明北京，於灤州遇敵，獲我兵三人。阿福尼與兄札福尼奮勇救出，授騎都尉世職。崇德六年，從征錦州，因事罷職。明年，承疇降。上召問兩軍情勢，承疇奏有一衣黃甲、乘花馬者，奮矛衝入，衆莫敢攖。遂命諸將各乘馬披甲如初，使承疇識之，承疇指阿福尼以對。上大悅，復其官。尋創發卒，依陣亡例廕卹。

彰古，蒙古正黃旗人，姓翁果特氏，贈雲騎尉，弟孟格色珥襲。邁圖，滿洲正黃旗人，姓納喇氏，世居布顏。崔應泰，漢軍鑲黃旗人，子世榮，官至廣東瓊州鎮總兵。

董廷元 弟廷儒 廷柏

董廷元，正白旗漢軍，與弟廷儒、廷柏並以閒散從征。天命六年，大兵攻瀋陽，廷元先登，陷陣，敗明兵。上嘉其勇，授寬甸守備。天聰五年，從征大凌河。六年，從征察哈爾。七年，從征旅順口、江華島，俱有功。崇德元年，從征朝鮮。二年四月，從恭順王孔有德征皮島。明總兵沈世魁陣海口，廷元以小舟從北衝入，明兵礮碎之，廷元與家丁六人歿於海，巨艦繼進，遂克皮島。七月，兵部言：「皮島陣亡將士骸骨，莫能辨識，今合葬於通遠堡。」賜廷元祭葬銀六百兩。

廷儒積功爲大同守備。順治五年，大同總兵姜瓖謀叛，以廷儒善騎射，勇略過人，爲士卒所畏愛，憚不敢遽發，乃佯以宴射，誘廷儒至署，徐語之曰：「山西將弁多我舊屬，我振臂一呼，皆響應。公若助我，則大事可成，無憂富貴！」廷儒怒罵曰：「逆賊！汝受國家厚恩，不思報，乃萌逆志，萬死不足盡汝罪。我今即手刃汝！」拔佩刀與賊鬪，賊羣執之。廷儒罵不絕口，賊剖其腹，支解之，併其子開國等，及男婦二十七人，俱被害。嗣絕無可廢，特贈昭武將軍，祭葬如例。

廷柏，初任驍騎校。崇德五年，從征明圍錦州，同參領孫有光擊松山步兵，敗之，又敗杏山騎兵。七年，又與有光擊敗閭洪山守兵。明兵自松山夜犯我壕塹，廷柏用紅衣礮卻之，進攻塔山城，殺功列二

等。又擊杏山城，敍功列一等佐領。八年，從攻前屯衛、中後所等城，皆以紅衣礮克之。順治元年，授雲騎尉世職。二年，加騎都尉。從豫親王多鐸南征，破流賊，定河南。五月，克揚州。六月，克平湖、嘉善，取嘉興府，廷柏俱在事有功。時明魯王朱以海據紹興，大兵營錢塘江上。以海所署督師大學士張國維以兵九千人夜劫我營，廷柏從都統吳守進敗之。六年，從鄭親王濟爾哈朗征湖廣，明總督何騰蛟招流賊李錦等，連營拒。廷柏從副都統金維城，率兵至馬河，力戰，歿於陣。詔贈騎都尉，加一雲騎尉。子振國，襲。九年，恩詔加二等輕車都尉，世襲。振國仕至瓜洲總兵官。

瑚密色 色赫等

瑚密色，滿洲鑲黃旗人，姓佟佳氏，世居加哈。天聰初，來歸，以佐領銜駐防天瑞山，斬逃卒六十級，擒五十人。崇德元年，隨貝勒阿濟格征明，設伏昌平，敗明騎五百，趨通州，斬哨兵百人。偵盧溝橋，敗候卒。前後獲馬百餘匹，還取紅衣大礮，道遇明太監郭某及總兵祖大弼，戰卻之。旋率八旗前鋒薄明都，敗其兵，東略遵化，擒哨騎二十，復西至盧溝，明師自保定來援，擊敗之，生擒十三人。九月，隨貝勒多爾袞攻明松山，敗其總兵祖大壽。四年，攻杏山，斬獲甚衆。額爾克岱青部卒有陷於陣者，力援出之。五年，從圍錦州，左翼兵猝遇敵，瑚密色先登，奮擊，明師退，又敗之於杏山。敍功，授雲騎尉。七年，從奉命大將軍阿巴泰伐明，次豐潤，破明督師范志完兵，追至玉田。明千總二人率兵夜窺我師，擊走之。八年，大兵下山東，從攻青州，取其芻卒，復敗敵於德州城北。明將司馬獻來援，偕騎都尉色赫擊之退。

我兵有科爾沁二人中刃，爲敵所困。瑚密色躍馬直入，挾之出。師旋，至桑乾河，結浮梁以濟。志完驛我後，偕副都統納爾特還擊，生擒遊擊一人，明師潰。因與阿爾布尼、鄂碩及副都統鄂羅塞臣殿，志完復遣將追襲，連卻其衆。

順治元年，從入山海關，擊流賊，敗偽總兵唐通於一片石，追至安肅，斬獲無算。先驅至望都，再殲賊。復同都統譚泰逐北數十里。二年，擢佐領，授雲騎尉世職。十月，瑚密色、色赫及參領王元爵隨豫親王多鐸出征，取潼關。時賊結陣於山，瑚密色同鄂碩奮登，賊下山遁，遂據其山。賊騎散而復合，率前鋒兵乘勢馳下，賊皆披靡。別隊犯圖賚軍，復助擊，破之。又設伏敗賊馬步兵數千。三年五月，大兵下江南，色赫、王元爵俱在事有功，瑚密色破明兵二千餘於句容。明兵復合，進逼我軍，瑚密色直前衝突，明兵大敗。色赫擊敗明總兵黃蜚等於蘇。時明魯王朱以海踞紹興，浙江列郡多應之。六月，多羅貝勒博洛征浙，令王元爵徇湖州，土兵蜂至，元爵戰歿。博洛次杭州，魯王遣其督師侍郎孫嘉績、熊汝霖渡錢塘江來犯，瑚密色、色赫等擊敗嘉績兵，擒其隊帥，追至江中，汝霖兵殊死鬪，瑚密色中槍戰歿。色赫從定浙江，旋下福建，還過平湖，遇土寇，亦以中槍陣亡。

色赫，蒙古鑲藍旗人，姓墨勒濟氏，世居哈達。以佐領從圍錦州，敗明總督洪承疇騎兵，遂遷騎都尉。

王元爵，漢軍正紅旗人。以軍功授佐領，擢參領。議卹，瑚密色贈二等輕車都尉，子薩碧圖襲，色赫、王元爵並贈雲騎尉。元爵子秉恭襲職，從子秉政以佐領擢陝西駐防參領。順治八年，從征四川，明

桂王朱由榔所署總督龍名揚據敘州，擊之，陣亡，贈雲騎尉。

李芝桂 張泰瑞等

李芝桂，奉天人。順治五年，以貢生授山東東平知州。抵任甫二十日，汶上騎賊四五百營於楊柳店，四出劫掠。芝桂聞警，令州同葛方遠等守城，率家丁出城瞭探。抵城東柳林村，遇賊四十餘，卽迎剿，賊敗竄。時分守兗東道劉可徵亦來援，同追賊至三官廟，樹木叢雜，賊伏騎五百餘，步賊無算。芝桂奮勇入殺馬賊數人，可徵兵亦殺賊十餘。暮收兵，芝桂已人重圍，負傷陣亡。事聞，贈山東布政司參議，廕一子入監。是時大兵新定山東，土寇猶竊發，前後陣亡者有紳士張泰瑞、趙良輔、孫贊元、杜之棟、千總孫可誦、齊振海等。

泰瑞，淄川人。明生員。順治四年，賊謝遷攻淄川，泰瑞倡義抵禦，城陷，被執，脅以刃，厲聲曰：「死則死耳！肯從賊爲亂耶？」賊攢刺之，罵不絕口，死。六年，賊李梗攻新泰，生員趙良輔以罵賊被殺。八年，謝遷復聚黨劫長山，經淄川。會功令各縣舉縉紳中才略者一人，練鄉兵備寇，淄南推生員孫贊元。贊元聞賊肆劫，單騎往禦，矢斃賊二十餘，矢盡以佩刀殺賊數十，力竭自刎。是年，山寇王肖吾破郟城，舉人杜之棟不屈，罵賊死。可誦、振海並隸兗東道標千總，可誦剿賊於兗州府城，振海剿賊於柱子山，皆力戰陣亡。可誦、振海，俱蘭山人。

王德教 王維新等

王德教，奉天人。順治三年，任河間知府。四年，土賊起河間，東至天津及渾河左右俱擾，蠡縣賊率衆偪河間府城。德教與河間兵備道王維新嬰城守，委守備王丕承、章羽泰分汛抵禦。丕承、羽泰潛通賊，乘大雨，引寇自南門入，叛卒著白盔、白甲雜寇中，躍馬入市殺人。德教聞變，率家丁巷戰，死於南門內。巡檢潘柱、典史邵鯤咸隨戰，同日死。維新縊於署後之火神廟。天津賊莽寒等聚衆唐官屯肆掠，天津鎮標中軍副將周天命率兵抵賊巢，力戰，身被刀箭，面受重傷死。

有薛承所者，亦莽寒黨，居灣頭。天津鎮標中軍遊擊王應春往捕，獲其黨三人、馬一匹，行近唐官屯，賊偵知之，率衆出劫，槍矢並發，傷應春馬首，馬驚人村，被鉤落馬，死。又土賊羅洪宇亦乘機謀攻天津，先犯海防營，遊擊趙成功躍馬出，殺賊百餘，身中三矢，賊引去。越數日，賊三千餘復來攻，成功裹創出戰，力竭陣亡。洪宇復糾合德平賊至寧津縣，天津鎮右營遊擊孔道興駐防吳橋，聞報赴援，遇賊於張官店，奮勇衝殺，受傷落馬死。又滄洲盜李祥羽肆劫，吏目王廷貴率捕役鄉兵出捕。至王官村，馬賊二十餘、步賊百餘驟至，廷貴指揮鄉兵截殺，鄉兵失利，廷貴亦遇害。次年秋，土賊劉東坡肆掠渾河左右，東安縣典史陶弘才奉檄會剿，率民兵三百餘馳至武清界西，奮力抵禦，手殺數賊，身中八矢，被執不屈，死。

先後事聞，詔贈德教太僕寺卿，維新光祿寺卿，各廕一子入監。天命廕都司經歷，道興贈參將，餘

卹如例。

維新，奉天人，鯤，浙江紹興人，天命，直隸天津人，弘才，浙江會稽人。餘籍無考。

鄺引昌 袁夢吉等

鄺引昌，浙江諸暨人。順治元年，拔貢。三年，授沂州州同。恭順王孔有德南征，知其有幹材，檄隨營。

時流賊餘黨李錦、劉體純、郝搖旗及左良玉故將馬進忠等，附於明總督何騰蛟，分十三營，爲連絡拒守計。錦等淫掠如故，土寇乘間竊發，湖廣大擾。進忠攻武陵，知縣袁夢吉先事集流亡，繕城堞，練民壯，捍禦月餘。城陷，被執，罵不絕聲，進忠殺之於西關。土寇破當陽，戕知縣扈坤。雞籠山紅旗賊李榮在土寇中最桀驁，夜襲孝感，知縣卮炳元、典史郎元振集鄉勇守禦。榮驅衆圍城，矢石交集。炳元志不懈，賊內應，夜半火起，城陷。炳元不屈，被害。妻李氏罵賊死。元振亦爲賊所殺。

榮旋犯雲夢，大兵擒斬之。引昌言於有德曰：「王當以全力拒騰蛟，其鄉堡竊發者，請奉檄曉諭土民，俾各練屯聚，人自爲戰，土寇不難破也。」有德從之。引昌薦南漳知縣姚延儒才，請與俱。延儒，浙江歸安人，與引昌並以拔貢授職者也。引昌聞攸縣諸生陳六禮以率鄉勇擊山賊，被執死，請表其閭。遂偕延儒徧涉鄉堡，曉以大義，土寇多解散。五年，大兵擊走騰蛟，收復諸郡縣。有德將班師，引昌請留兵守，有德不從。引昌旋授永州府通判，有德去而湖廣復擾。十一月，騰蛟遣將攻永州，引昌城守三

月，大小三十六戰，城遂陷。引昌同妻黃氏、子尚英俱被害。體純、搖旗等犯南漳，延儒已擢山西大同府同知，未行，聞寇至，亟設守。搖旗以礮摧城，麾衆突入，延儒奮罵被殺。訓導賀泰來、典史濮昌國並死之。

時流寇出没無常，繼延儒知南漳者唐士傑，奉天人，甫蒞任，招流民復業，而寇復至。士傑度不能支，自焚死。

詔贈引昌、夢吉、延儒按察司僉事，賜祭葬，廕一子；泰來國子監學錄，昌國濟源縣主簿，餘分卹有差。

夢吉，山東榮城人，坤，奉天人，炳元，直隸長垣人，泰來，湖廣景陵人，元振，昌國，籍無考。

佟國仕 張國纓等

佟國仕，奉天人。任山西井坪路參將。順治五年，大同總兵姜瓖據城叛，分兵陷郡縣，遠近土賊應之。六年，瓖遣其黨周世德夜襲井坪，國仕聞賊至，躍馬出，率衆巷戰，手刃數十人，賊不敢偪。既而城內外舉火，聲四應，國仕知兵變，策馬陷陣，死。

偏關、大同、左衛接壤，瓖黨萬練思據之以應瓖，乘署參將張柱石調剿土寇出，與其黨孫珽、蘇繩武猝爲亂。原任偏關參將張國纓已乞病將歸，聞變，強起曰：「吾雖去官，不當爲國救死耶？」率僕從邱裕民等十餘人，思誘執練，而城中從賊者衆，共執國纓，羈二十日，終不屈，爲賊將燕元楨所殺。時寧武

協標營卒趙登舉、楊成等三百餘人素爲瓌所陰結者，亦執其副將李吉使降，吉怒叱之，知不免，投纆死。把總邱登戎戰歿。河保營參將石登仕聞變，登城守禦，家丁賈邦虎亦黨賊，率左右共執登仕，脅降不屈，爲邦虎所殺。外委把總李茂、劉世臣亦以不降遇害。土賊張五、虞允應瓌圍蒲州，河東道楊千古率中軍許世德禦之。兵內變，開門迎賊，千古率親兵巷戰，奪門出，世德力戰陣亡。方瓌初叛時，有佟養昇以章京管牧馬事，駐大同，聞變，率從役巷戰，死之。事聞，議卹。詔贈國仕副將，餘優卹如例。

國纓，奉天人，順治二年武進士，登戎，山西寧武人，石登仕、佟養昇，俱奉天人，李吉、李茂、劉世臣、許世德，籍無考。

武韜 王廷衡等

武韜，山東曹縣人。順治三年一甲二名武進士。四年，授山東蒲州營遊擊。五年，大同總兵姜瓖叛，韜嚴設城守。十一月，瓌據太原晉祠，鎮都司王廷衡繕戰具，謀攻之。賊覺，燒其戰具，廷衡焚死。

六年二月，解州生員張做等聚衆千餘應賊，殺里居員外郎侯佐與其父嗣晉，而蒲州接壤之絳州、聞喜、夏縣相繼告變。五月，賊薄蒲州城，韜身先士卒，開門迎戰，大敗之。越數日，賊悉精銳來犯，城外軍民悉爲脅從。城中馬步卒不滿八百，韜誓以死守，與守備許世德守北門，知州錢法裕、守備賈斯明、封汝宦守東門，河東道楊千古守西門，千總王綸守南門。六月，賊渠虞允、韓昭宣等驅衆萬餘合攻，汝宦陰通賊，啓關，叛將王躍龍縛斯明去。賊大至，奪法裕印，據倉庫，一城大擾。千古偕從者數人，懷

印出西門，渡河乞援。輒轉戰出重圍，適官舟相迎，揮涕曰：「封疆失守，不死，非忠也！有母在而棄之，非子也！願決死戰。」再入重圍，殺賊百餘，力竭被執，猶誓不絕聲，遂遇害。賊勢益張，徇諸郡邑，執平陽鎮標都司魯學禮，迫以偽職，不受，俾供芻秣，亦不與，賊怒，殺之。巡捕營都司謝應舉奮臂大呼，令居民勿從逆，遇瓌於太平樓，力戰死。妻孳並殉，惟子天龍以先期入都，獲免。沂鎮營遊擊劉懋德奉檄運馬至平陽，偕其弟千總懋謙及聽用官江山定等巷戰死。

同時死難者，又有右營守備伍進學，大同前衛署守備徐進第、楊和道，中軍守備耿煥，威遠署守備李良臣，殺虎堡守備趙坤，威魯堡守備李長盛，助馬堡守備楊宏祖，守備李進忠，千總宋國中，寧道營千總王命新，垣曲縣防城百總張從義，俱不屈，遇害。

廷衡，山西陽曲人，順治二年舉武鄉試第一，以千總累遷都司。事平，議卹，賜祭葬。學禮、應舉贈遊擊，懋德贈參將，進忠贈都司，廷衡、進學、進第、煥、良臣、坤等，俱恩卹如例。

周永緒 尹明廷等

周永緒，安徽盱眙人。順治六年進士。八年，定南王孔有德以廣西新定，請速簡道府，以安輯兵民。於是部銓永緒爲右江道，而以尹明廷爲平樂知府，沈倫爲梧州知府。明廷，江南吳縣人，倫，湖廣天門人。皆六年進士，與永緒並在部觀政，故簡用之。永緒駐平樂，偕明廷悉心撫循，民逃者盡來歸，設屯堡，行旅無恐。巡按御史王荃可以永緒善安輯，疏薦之。梧州爲廣東西孔道，倫儲芻茭，大兵往來

供億無匱，而閭閻不擾。

時明桂王朱由榔遁安隆，其故將多招集亡命，聲言復取廣西，居民驚徙。倫乃葺學校，課士子，以安人心。九年七月，李定國陷桂林，乘勝破平樂，永緒不屈死，明廷被執。定國分兵攻梧州，倫守禦力竭，城陷，死之。定國執明廷，誘以官，不屈。會定國移兵擾湖南，明廷得脫歸。巡撫陳維新新至，明廷上謁，備言賊形勢。會總兵練國安已復平樂，維新檄明廷仍知知府事。明廷星馳至，曰：「民新被瘡痍，稍緩，恐不聊生矣！」取餘糧在敵營者，賑恤貧乏，益嚴守備。十年六月，定國自湖南復攻平樂，國安退廣東。七月，城陷，執明廷，欲脅降之，明廷大罵曰：「狂賊！死吾分也，何多言？」定國怒，去其衣，束以魚網，齮磔之，至死，罵不絕口。十二月，維新以永緒、明廷死事狀聞，詔贈永緒光祿寺卿，明廷太僕寺卿，各廕一子入監。

明廷之死也，居民感其惠政，潛瘞骨於府治坊側。廣西平，明廷子宗文赴平樂求瘞所，徬徨無所遇。有老媪指示之，乃負骨歸葬。宗文後以廕，官河南柘城知縣。

馬騰龍 張順等

馬騰龍，直隸宣化人。順治初，以武舉隨定南王孔有德屢立戰功，累擢至桂林提標遊擊。九年七月，李定國犯桂林，騰龍竭力守，城陷，與鎮標都司張順，撫標旗鼓守備暢大理，提標千總楊光先，把總王國用、劉祿，皆巷戰死。騰龍弟從龍、妻郭氏皆殉。大理出戰時，家屬並自縊官署後，其僕李喜收骨

歸京師。光先父母見勢迫，先自刎死。光先乃手刃其妻妾及二幼子，然後挺身出鬪，殲賊五人。順江、南上元人，大理，漢軍鑲白旗人；光先，江寧人，國用，順天人；祿，昌平人。

先是五月間，李定國連陷靖、沅、武岡，有德檄諸道兵集梧州，爲桂林聲援。是時山谷要隘已爲敵據，柳慶副將何九成方守慶遠，見檄即提兵急衝出，日夜鏖戰，甫達梧州，身殞。羅河副將沈邦清駐防羅城，孤軍被困，屢突不能出，與把總張志雄皆力戰陣亡。邦清子亦殉於桂林，失其名。有李養成、周雄者，並以千總署守備，戰於融縣之沙鞏村，敗，俱死。又有把總沈敬，池州人，先一月戰歿於全州；許泰，易州人，先一年戰歿於湖南新田縣；皆以禦定國死。

先後奏聞，議卹，騰龍贈一級；其同時死難諸員，惟九成以不係陣亡，部無議卹；光先闔家慘烈，詔優贈守備；餘依例贈卹有差。

九成、邦清、志雄、養成、雄，里籍俱無考。

金漢蕙 郭養志等

金漢蕙，浙江義烏人。順治六年進士，隨征廣西。八年，授分守右江道。時李定國由湖南擾廣西。九年七月，圍桂林，驅象來攻，城陷，百總郭養志戰死。定國使其裨將李茂吉等分兵犯柳州，漢蕙率士民拒守，城陷，執漢蕙赴衡州賊營。十一月，大兵復衡州，漢蕙乘間逸，賊追及，遇害於兩路口，其腋下挾救書，徧染血跡。廣西巡撫陳維新收得之，貯布政司庫。定國旋犯梧州，分三隊攻，官兵亦分隊應。

之。千總蔣應泰等隨總兵線國安爲一隊，於龍母廟後高岡迎戰，賊以象衝陣，官兵逆戰，多斬馘。旋開河岸一隊失利，國安分兵救之，勢益單，被圍數日，不能出。應泰與把總李得祖、金大成、千總趙興楚、劉定邦，俱陣沒。大兵尋復梧州，其餘孽猶據南隘美村，國安遣佐領王世富等進剿。賊倚山拒戰，世富擊走之，追至山巔，有來援者，槍洞腹死。先後事聞，詔贈漢蕙光祿寺卿，謚其子以琳入監，世富贈雲騎尉，姪成功襲，餘卹如例。

養志等，籍俱無考。

鄔象鼎 慎倬允等

鄔象鼎，浙江仁和人。順治六年進士。時以兩廣新附，亟需道府，簡用新進士，象鼎授廣東羅定兵備道。瑤、僮多反側，象鼎偕羅定知州慎倬允練鄉勇，斬其渠，撫餘衆。瑤、僮遠徙，民賴以安。九年，倬允以逋賦失徵，議革職，未離任。十年三月，明桂王將李定國窺廣東，連陷州縣。五月，定國遣其黨吳子聖攻羅定，象鼎、倬允及署州同金芳、署吏目陳炳新分設守禦。子聖驅其衆梯登，象鼎等擊卻之。外委把總張九貴斃於礮。六月，子聖對城築礮臺，飛彈入城如雨，士卒多死。象鼎集僚屬曰：「困守無益，當死戰！」乃立賞格，募死士，遣中軍郭宗振及城守都司陳一明、守備冷時乘等出迎敵，子聖驅鄉民爲疑兵，自率銳卒力鬪。時宗振等戰敗，俱潰圍走。子聖遂入城，執象鼎、倬允於城樓，道遇芳、炳新，遣人繫守之。芳知守之者具也，（門）給人火藥局，擲火焉，藥發屋轟，芳及凶渠俱斃。平南王尚可喜遣